

口才出眾 母校委任校友會主席

●張達明與張樂悅齊齊出席學校活動大受歡迎。



採、攝：Debbie Lum



●張達明自陳樹渠太太（即校董）陳麗玲手中接過委任狀，正式成為校友會主席。

張達明昨日重返母校，出任陳樹渠紀念中學第一屆校友會主席，張達明即場領唱，又客串學生校慶劇，更為學校戲劇興趣班做顧問講師。陳樹渠太太（即校董）陳麗玲親手頒授委任狀，陳太更讚張達明有宋世傑口才，無稿演講都咁醒，而不少圈中人亦是陳樹渠紀念中學舊校友，如：張衛健、邱淑貞、麥長青等，而周潤發亦曾就讀夜校。

達明坦言就讀過的小、中學都執晒笠，只剩此間，所以特別有感情，達明只肯透露是八〇年代畢業生，更曾得辯論隊冠軍，佢大講校園趣事，佢話：「最難忘是幫同學改花名，記得一次成班同學去踢波落大雨，返到課室仲好濕，我哋白色校服淋濕好『透』，有個男同學一起身，成條紅色底褲，我哋咪叫佢『紅牛』！」自己則被人冠以「蛋撻仔」花名。

唱歌要睇貓紙

張樂悅應邀任表演嘉賓，她唱歌時要睇貓紙但現場仍有不少學生Fans支持，被包圍影相、取簽名，風頭強勁，受歡迎程度蓋過主角張達明，張樂悅心情大好，佢話：「好開心，我未嚟過呢間學校，但咁多Fans支持，證明達明話佢學校有我Fans係真呀，在學校唱歌好開心，地方細細坐咁多人，好似開演唱會咁！」而本身是聖保羅畢業的張樂悅與舊校友間中都有聯絡，佢更透露早前設計的慈善T-shirt反應好，三四日內就斷貨。另達明透露年尾會有新Talk Show，但因子華、吳鎮宇等各有各忙，三年內不會再做鬚根Show。